

昌黎先生集

冊十二



昌黎先生遺文目錄

聯句

有所思

遣興

遺詩
墓
贈劍客李園

遺詩

同竇韋尋劉尊師不遇

春雪

贈族姪

嘲鼾睡 六首

晝月

贈張徐州莫辭酒

辭唱歌

知音者誠希

酬藍田崔丞立之詠雪見寄

潭州泊船呈諸公

飲城南道邊古墓上逢中丞過贈禮部衛員

外少室張道士

池上絮

書

答侯生問論語

墓誌

相州刺史御史中丞田公故夫人魏氏墓誌

銘

啓

昌黎先生皇帝卽位賀宰相

狀

奏汴州得嘉禾嘉瓜

皇帝卽位賀諸道

皇帝卽位降赦賀觀察使

潮州謝孔大夫

疏

憲宗崩慰諸道

題名

長安慈恩塔

洛北惠林寺

謁少室李渤

福先塔寺

嵩山先封宮

迂杜兼

華嶽

昌黎先生遺文目錄

憲宗成風漸盛

南漢轉將大夫

皇朝唯世新誠實學

皇朝唯世新誠實學

委木似醫嘉禾嘉瓜

張

昌黎先生集遺文

聯句

有所思聯句

此下三聯句見孟東野集

相思繞我心日夕千萬重
年光坐晚晚春淚銷顏容

郊臺鏡晦舊暉庭草滋新茸
望天山上石別劍水中

龍愈

遣興聯句

上說見

我心隨月光寫君庭中央
郊月光有時晦我心安所

忘愈常恐金石契斷為相思腸
郊平生無百歲岐路

有四方愈四方各異俗適異非所將
郊鴛蹄顧挫秣

逸翮遺稻梁愈時危抱獨沉道泰懷同翔
郊獨居久

寂默相顧聊慨慷愈慨慷丈夫志可以耀鋒鏗
郊蘧

甯知卷舒孔顏識行藏愈朗鑒諒不遠佩蘭永芬芳

郊
苟無夫子聽誰使知音揚愈

贈劔客李園聯句同上

天地有靈術得之者唯君郊築爐地區外積火燒氛

氤愈照海鑠幽怪滿空歎異氛郊山磨電弈弈水淬

龍螭螭愈太一裝以寶列仙篆其文郊可用懾百神

豈唯壯三軍愈有時幽匣吟忽似深潭聞郊風胡久

已死此劔將誰分愈行當獻天子然後致殊勳郊豈

如豐城下空有斗閒雲愈

遺詩

同竇牟韋執中尋劉尊師不遇

此詩得於五竇聯珠集公時任都官外郎同洛陽令竇牟河南令韋執中以訪

韻之元和五年也詩以同尋師為韻人各一首洪氏年譜亦見

秦客何年駐仙源此地深還隨躡鳧騎來訪馭風襟

院閉青霞入松高老鶴尋猶疑隱形坐敢起竊桃心

春雪

今按此詩得於文苑英華其後即以正

集系之疑亦公作也已上並方本所載

者本所無者今悉存之諸本更有遺文

不一卷方獨取贈族姪朝野睡二篇餘並

載其目而不

載其文云

片片驅鴻急紛紛逐吹斜到江還作水著樹漸成花
越喜飛排瘴胡愁厚蓋砂兼雲封洞口助月照天涯
暝見迷巢鳥朝逢失轍車呈豐盡相賀寧止力耕家

贈族姪

上或有徐州字

我年十八九壯氣起曾中作書獻雲闕辭家逐秋蓬
歲時易遷次身命多厄窮一名雖云就片祿不足充
今者復何事卑棲寄徐戎蕭條資用盡濩落門巷空
朝眠未能起遠懷方鬱悵擊門者誰子問言乃吾宗

自云有奇術探妙知天工
既往悵何及將來喜還通
期吾語非佞當為佐時雍

嘲鼾睡

李希聲家有退之遺詩數十篇希聲云皆非也獨嘲鼾二篇似之錄于未

澹師晝睡時聲氣一何猥
頑颯吹肥脂坑谷相嵬磊
雄哮乍咽絕每發壯益倍
有如阿鼻尸長喚忍衆罪
馬牛驚不食百鬼聚相待
木枕卜字裂鏡面生疥癩
仁吾欲責真宰 尋虱搜耳
猛作濤翻海太陽不忍

○疥音肥癩音腫病也

鐵佛聞 眉石人戰搖腿孰云天地

明飛御皆惰怠乍如彭與鯨
呼冤受菹醢又如圈中
虎號瘡兼吼餒雖令伶倫
吹苦韻難可改雖令巫咸
招寬爽難復在何山有靈
藥療此願與採

澹公坐臥時長睡無不穩
吾嘗聞其聲深慮五藏損
黃河弄瀆瀑梗澀連拙
斂南帝初奮槌一竅洩混沌

莊子應帝王篇南海之帝儵北海之帝忽中央之帝
混沌相與甚善儵與忽謀報混沌之德曰人皆有七
竅以視聽食息此獨無有嘗試迴然忽長引萬丈不
鑿之日鑿一竅七日而混沌死迴然忽長引萬丈不
可忖謂言絕於斯繼出方袞袞幽幽寸喉中草木森
莽蕪忖○莽音本蕪音盜賊雖狡獪亡蒐敢窺闖鴻蒙
摠合雜詭譎騁戾狠乍如鬪呶呶忽若怨懇賦形
苦不同無路尋根本何能埋其源惟有土一畚

畫月

玉盃不磨著泥土青天孔出白石補兔入白藏蛙縮
肚桂樹枯株女閉戶陰爲陽羞固自古嗟汝下民或
敢侮戲譏盜視汝目瞽

贈張徐州莫辭酒

莫辭酒此會固難同請看工女機上帛半作軍人旗
上紅莫辭酒誰爲君王之爪牙春雷三月不作響戰

士豈得來還家

辭唱歌

諸本注云此篇恐非公作今姑存之

抑逼教唱歌不解看豔詞坐中把酒人豈有歡樂姿
幸有伶者婦腰身如柳枝但令送君酒如醉如憨癡
聲自肉中出使人能透隨復遣慳悵者贈金不皺眉
豈有長直夫喉中聲雌雌君心豈無恥君豈是女兒
君教發直言大聲無休時君教哭古恨不肯復吞悲
乍可阻君意豔歌難可爲

知音者誠希

古詩不愁歌者
苦但傷知音希

知音者誠希念子不能別行行天未曉携手踏明月
酬藍田崔丞立之詠雪見寄

京城數尺雪寒氣倍常年泯泯都無地茫茫豈是天
崩奔驚亂射揮霍訝相纏不覺侵堂陛方應折屋椽

出門愁落道上馬恐平韉朝鼓矜凌起山齋酪酏眠
吾方嗟此役君乃詠其妍水玉清顏隔波濤盛句傳
朝飧思共飯夜宿憶同氈舉目無非白雄文乃獨玄
潭州泊船呈諸公

夜寒眠半覺鼓笛鬧嘈嘈閨浪春樓堞驚風破竹篙
主人看使範客子讀離騷聞道松醪賤何須恡錯刀
欽城南道邊古墓上逢中丞過贈禮部衛員

外少室張道士

中丞謂
裴度也

偶上城南土骨堆共傾春酒三五盃爲逢桃樹相料
理

○料
音聊

不覺中丞喝道來

池上絮

池上無風有落暉楊花晴後自飛飛爲將纖質凌清
鏡濕却無窮不得歸

記

監軍新竹亭記公按此文恐非今刪去

書

答侯生問論語書

於公作論語傳未成而歿見

之說者甚明今世所傳如宰子晝寢以晝作晝子在齊聞韶三月不知肉味以

三月作音浴乎沂以浴作泓子在回何敢死以死作先難甚鄙淺然為伊川之

學之皆取之

愈白侯生足下所示論語問甚善聖人踐形之說孟子詳於其書當終始究之若萬物皆備於我反身而誠是也苟有偽焉則萬物不備矣踐形之道無他誠是也足下謂賢者不能踐形非也賢者非不能踐形能而不備耳形言其備也所謂具體而微是也充實之謂美充實而有光輝之謂大充實則具體未大則

微故或去聖一閒或得其一體皆踐形而未備者唯反身而誠則能踐形之備者耳愈昔注解其書而不敢過求其意取聖人之旨而合之則足以信後生輩耳此說甚爲穩當切更思之愈白

墓誌

相州刺史御史中丞田公故夫人魏氏墓誌

銘

下或有注并序字○今按此篇不類公
它文且云元和八年則又非少作其非
公作無疑
今刪去

啓

皇帝卽位賀宰相啓

愈啓伏見冊命皇帝以閏月三日嗣臨大位以主神人含生之類孰不蒙賴相公翼亮聖明大慶資始伏惟永永與國同休愈下情不勝慶躍限以所守不獲

隨例拜賀謹差某奉啓不宣謹啓

狀

奏汴州得嘉禾嘉瓜狀

方本有之以附嘲駢
睡之後云此篇見文

苑英華蓋為董晉作
董晉行狀亦可攷

右謹按符瑞圖王者德至於地則嘉禾生伏惟皇帝
陛下道合天地恩霑動植邇無不協遠無不賓神人
以和風雨咸若前件嘉禾等或兩根並植一穗連房
或延蔓敷榮異實共蒂既叶和同之慶又標豐稔之
祥感自皇恩微莖何極於造化親逢嘉瑞小臣喜遇
於休明無任

皇帝即位賀諸道狀

伏見勅命皇帝以閏正月三日嗣臨寶位海內惟新
凡在臣庶不勝慶幸惟俯同下情未由拜賀但增馳

戀謹奉狀不宣某再拜或無此三字

皇帝即位降赦賀觀察使狀

二月五日恩赦今月二十四日卯時到州當時集百官僧道百姓宣示訖聖上以繼明之初垂惟新之澤曲成不遺於萬物大賚遂延於四海寰宇斯泰品類皆蘇渥恩普霑遠近同慶蘇渥或乙此二字非是愈以藩條有制拜賀無由不勝欣抃之至謹差萍鄉縣丞李某奉

狀陳賀某或作於

潮州謝孔大夫狀

此篇見洪氏年譜方氏增考云公既南行家亦謹逐

二月二十七日已過商州之南而此狀言七月二日猶未至潮又姪孫湘亦從公而南

何故猶未至潮又姪孫湘亦從公而南故宿會江口有示湘詩而過始與江口

詩謂目前百口還相逐與狀言妻子孫姪未到此者皆不相應此狀恐也○今

按公之到郡既不見年之實則此狀無由可考方氏引會江始興二詩以證

此狀之妄蓋亦有理但恐或是已過始與留家在後而獨先到郡亦不可知但必見其詞類袁州申使狀則又未有以

伏奉七月二十七日牒以愈貶授刺史特加優禮以州小俸薄慮有闕乏每月別給錢五十千以送使錢充者開緘捧讀驚榮交至顧己量分慚懼益深欲致辭為讓則乖伏屬之禮承命苟貪又非循省之道進退反側無以自寧其妻子男女并孤遺孫姪奴婢等尚未到官窮州使賓罕至身衣口食絹米足充過此以往實無所用積之於室非廉者所為受之於官名且不正恃蒙眷待輒此披陳

疏

憲宗崩慰諸道疏

愈言上天降禍大行皇帝奄棄萬國伏惟攀慕永痛

哀感難勝某承詔不任號絕限以官守拜慰未由伏
增惶戀謹差某奉疏不宣韓愈再拜

題名

長安慈恩塔題名

已下並方
本所載

韓愈退之李翱翔之孟郊東野柳宗元子厚石洪濬
川同登

洛北惠林寺題名

韓愈李景興侯喜尉遲汾貞元十七年七月二十二
日魚于温洛宿此而歸昌黎韓愈書

謁少室李渤題名

愈同樊宗師盧仝謁少室李拾遺

福先塔寺題名

處士石洪濬川吏部員外王仲舒弘中水部員外鄭

楚相叔敖洛陽縣令潘宿陽乾明國子博士韓愈退之前試左武衛胄曹李演廣文前杭州錢塘縣尉鄭絃文明元和三年十月九日同遊

嵩山天封宮題名 歐公跋語附

元和四年三月二十六日與著作佐郎樊宗師處士盧仝自洛中至少室謁李徵君渤樊次玉泉寺疾作歸明日遂與李盧道士韋濛僧榮並少室而東抵衆寺上太室中峯宿封禪壇下石室遂自龍泉寺釣龍潭水遇雷明日觀啓母石入此觀與道士趙玄遇乃歸閏月三日國子博士韓愈題

歐公集古跋尾云右韓退之題名二皆在洛陽其一在嵩山天封宮石柱上刻之記龍潭遇雷事天聖中余爲西京留守推官與梅聖俞遊嵩

山入天封宮徘徊柱下而去遂登山頂之武后封禪處有石記戒人遊龍潭者毋語笑以黷神龍龍怒則有雷恐因念退之記遇雷意其有所誠也其一在福先寺塔下當時所見墨蹟不知其後何人模刻于石也

迺杜兼題名

河南尹水陸運使杜兼尚書都官員外郎韓愈水陸運判官洛陽縣尉李宗閔水陸運判官伊闕縣尉牛僧孺前同州韓城縣尉鄭伯義元和四年九月二十一日大尹給事奉詔祠濟瀆回愈與二判官於此迎候遂陪遊宿愈題

華嶽題名

此文刻於金天祠石闕昔人嘗集華嶽題名自唐開元至後唐清泰

錄爲十卷此文雖未必盡出公手然筆削之嚴要非公不可故錄之

淮西宣慰處置使門下侍郎平章事裴度副使刑部
侍郎兼御史大夫馬總行軍司馬太子右庶子兼御
史中丞韓愈判官司勳員外郎兼侍御史李正封都
官員外郎兼侍御史馮宿掌書記禮部員外郎兼侍
御史李宗閔都知兵馬使左驍衛將軍威遠軍使兼
御史大夫李文悅左廂都押衙兼都虞候左衛將軍
兼御史中丞密國公高承簡元和十一年八月丞相
奉詔平淮右八日東過華陰禮于嶽廟總等八人實
備將佐以從

昌黎先生集遺文

韓集點勘卷之一

校東雅堂本

東吳陳景雲

李序

教人自爲注 韓子作樊宗師墓銘云惟古於詞
必已出降而不能乃剽賊序所謂教人自爲者正
訓以詞必已出耳爲當如字讀注與音並非 注
論語十卷 張水部祭韓子詩魯論未訖注手跡
猶微茫則此云十卷者乃未成之書也今所傳論
語筆解出後人僞託

目錄

祭文中祭虞部張員外後脫祭河南張員外一題
又祭滂文後衍祭張給事一題

卷首宋莒公語

馮元謐章靖以博洽稱宋史有傳莒公雅重之故校韓集特從馮本

感二鳥賦 觸白日之隆景 景古影字時方仲夏

故曰隆景 雖家到而戶說 二句指光範上書

不遇事離騷衆不可戶說兮孰云察余之中情公

語本此或作戶曉者非 篇末注引歐公語 結

句明云無羨斯類而歐公乃以不過羨二鳥光榮

議之非篤論也

復志賦 將就食於江南 注全採洪譜之文但多

貞元元年四字按歐陽詹哀辭云建中貞元間余

就食江南則非至貞元元年始避地江左也此四

字當刪去

閔己賦 題注 公之去徐在府主未薨之前外集

有題李生壁文可證非因府喪而罷也 本傳有
才高數黜官語蓋謂貞元末由御史黜官至元和
初自謫籍召爲博士久之又從省郎下遷也此賦
作於貞元中在公從事使府之後未除朝官之前
晁說失之 咸通本乃咸通中中書舍人令狐澄
藏本第五卷寄崔立之詩視物隔襪襪下注引澄
本卽此本也

別知賦

題注

按公與崔羣書貞元十八年也書

云僕自少至今從事往還朋友間一十七年則公
之取友天下當自貞元二年入都之歲始也是賦
作於二十年歲行猶未滿兩周故曰將也注非
知來者二句 言此別之後良友旣不可以頻得
而遷客又未離謫地故申之以掩郭郭云云也舊

注解來者未切蔓引論語尤可削
斯百一而為

收文粹作斯一旦而為仇
按爾雅釋詁云仇匹

也詩與子同仇一旦為仇猶言傾蓋如故也似作

仇字其義獨長而諸本未採

元和聖德詩 題注 按序云臣曰與羣臣序立紫

宸殿陛下親望穆穆之光則此詩必非分教東都

時作也 所在麻列 按麻南宋初蜀人韓仲韶

本作森朱子之說蓋暗與舊本合特偶未採及耳

然太白夢游仙姥詩仙之人兮列如麻則作麻列

亦似有據 分卒禁禦注神策京師行營 按師

當作西 區外句注鎮州常山縣 按縣當作郡

滌濯刻礪句注 詩勿翦韓詩作勿刻見經典

釋文此注所本

南山詩

海浴褰鵬囀注

或作騫之騫當作騫

爛熳堆衆皴注

朱子言此蜀本之誤者當謂嘉

祐中蘇溥刊本上言方從蜀人韓仲韶本則南宋

初臨邛韓醇所刊本也蓋石菴之注雖出於韓而

字之從皴則嘉祐蜀本已然故特分別言之耳又

沈元用名晦錢塘人崇寧六年進士第一人宣和

中嘗刊韓柳集後入金會再應舉登第歸朝歷官

徽猷閣學士

將歸操

題注聞殺鳴犢作

鳴上當從蜀本增竇

字

狄之水兮注與清水合沛瀆

按沛當作沛

別鵠操

題注

鵠與鶴本一字古人皆通用

秋懷詩

題注

按詩乃元和初自江陵掾召爲國

子博士時作行狀云時宰相有愛公者將以文學

職處公有爭先者構飛語公恐及難求分司東都
是詩中有云學堂日無事蓋方官國子也又云南
山見高稜則猶未赴東都也至語穽心兵諸語其
在已聞飛語後歟更以釋言篇參證公元和元年
六月進見相國鄭公後數日卽有爲讒於相國之
座者則是秋正公憂讒畏譏時也 彼時何卒卒
注 司馬相如當作司馬遷 汲古得修綆注
莊子外篇綆短者不可以汲深荀語本之注自當
引莊

赴江陵途中

將疑斷還不注

蔡說非誤洪譜自

踈耳方氏增考年譜辨之詳矣按公岳陽樓詩云
前年出官由此禍最無妄姦猜畏彈射斥逐恣欺
誑又祭張署文云彼婉孌者實憚吾曹側肩帖耳

有舌如刀皆斥王韋之黨非謂李實也苕溪一條
當刪 昨者京師至 京師當從蜀本作京使

岐山下二首

題注

據唐史程昔範敬宗初官拾

遺爲宰相李逢吉私人名在八關十六子之列則
昔範乃名非字也

北極贈李觀注

題下注已見前卷重雲篇此複出

當刪

此日足可惜

假道盟津注卽盟津也

盟當作孟

東西出陳許

東西當從宋閩本作東南

按公

始至徐徐帥館之睢上至秋方辟爲從事詳見與

東野書中注家自失採遂誤以爲初至卽授幕職

也此詩乃未爲從事時作故喜張之來有連延三

十日晨坐達五更之語若已入使院則方晨入暮

歸安得此閒適耶合全篇細讀之舊注之疎益見矣
淮之水舒舒時送籍返和州故有淮水楚
山二句和隸淮南又楚地也

醉贈張秘書性情方浩浩東坡文見客舉杯徐

引則吾胸中為之浩浩焉又題畫詩聚蚊金谷是
何人皆本公詩語法言淵騫篇貨殖曰蚊此蚊字

所本阿買不識字注或問阿買是退之何人

按或問下脫魯直二字此必其子姪小字句乃韓
仲韶注既引趙說此注複出當刪

送靈師梟盧叱回旋注按晉史劉毅擲得雉大

喜曰非不能盧不事此耳舊注刪改本文殊晦澀
不可解又誤晉作宋千尋墮幽泉注尋或作潯

按潯與尋同兩潯字並當作潯見說文開忠

二州牧 按開牧未詳忠牧蓋謂李吉甫也吉甫

以貞元中自郎署左官於外及在忠州又六年不

遷故曰失職是詩作於貞元二十年而二牧之贈

僧詩則又在前觀下昨者句可知矣 落落王員

外注 戶部當作吏部

縣齋有懷 風雨靈臺夜 謂官四門博士也漢光

武立明堂辟雍靈臺號三雍宮 誰為傾國媒注

李延年傳漢武帝歌 按傳當作侍 何能一戰

霸注 按公馬少監誌云始余初冠應進士貢在

京師後五六年吾成進士去而東游則貢在京師

者乃未成進士以前事至登第後上宰相書則自

稱前鄉貢進士矣此注貢於京師四字當削 何

用畢婚嫁注後漢向平字子平 按上平字當作

長

合江亭

范石湖驂鸞錄曰合江亭今名綠淨閣取

韓詩綠淨不可唾句蓋石湖赴桂林時過此而目

覩其懸榜也

邦君實王佐句宋本下注故相齊

映所作老郎一聯下注宇文郎中炫又增其制君

侯一聯下前刺史元澄無政廉使楊公中丞奏黜

之朝廷遂用鄒君此考異所謂篇內三處注文也

按此三條定公自注之文刊本誤以爲出於後人

而削之題下注亦止採二條尙遺其一

宇文炫

官終刑部郎德宗欲復用盧杞炫時爲拾遺與同

官陳京等力爭而止風節偉矣

陪杜侍御游湘西寺

題注湘西觀察使

按湘西

當作湖南

指摘困瑕垢

按公自陽山遇赦僅

量移江陵法曹蓋本道廉使楊憑故抑之贈張功
曹詩所謂州家申名使家抑坎軻祇得移荆蠻是
也時韋王之勢方熾憑之抑公乃迎合權貴意耳
詩中椒蘭絳灌自斥韋王而指摘瑕垢蓋謂使家
之抑也

岳陽樓

朝過宜春口注

按公是時方自潭抵岳

以趨荆南不應過袁州之境觀下夜纜巴陵洲句
則宜春口蓋在岳州之南乃洞庭中小洲渚名也
注承洪譜之誤擢拜識天仗謂御史之擢也

唐制三院御史有缺悉由御史大夫及中丞薦授
貞元之季御史臺久不除大夫皆中丞專其事公
之入臺時李汶爲中丞蓋由汶薦也時同官中名
最著者如柳宗元劉禹錫李程張署等俱汶所薦

故宗元祭汶文云慎擇寮吏必薪之楚斯篤論矣
時公先貶官於外故不預祭耳惜史逸汶傳而薦
公事尤失傳當以宗元祭文及新史王播傳參考
自可得之 但懼失宜當 當謂奏當也奏當見
漢書師古注當謂處其罪時公量移江陵法曹故
云爾言惟恐司刑而不得其平也

送文暢 昔在四門館注 按博士上衍國子二字

觀題下注自明 少小學城闕 按詩子衿刺學

校廢也 少小句蓋言此僧少嘗爲士耳注未明悉

僕射領北門 謂河東帥嚴綬也注承洪譜之

誤唐以太原爲北門屢見於史田季安時鎮魏博
不當言北門至宋都大梁始以魏地爲北門如寇
萊公鎮魏自言北門鎖鑰非準不可是也洪說失

之又唐河東帥府兼統蕃部觀公作鄭儋墓誌可見故繼以威德壓胡羯之句

答張徹

日月垂十齡

按公此詩發端云首敘始

識面而其下以浚郊避亂睢岸連居爲識面之始則知公與徹邂逅在貞元十五年己卯去汴居徐之日至丙戌凡八年故曰垂十齡也若從丙子訖元和改元之歲已踰十載與詩語不符矣

淚皆

還雙熒注

按公詩敘朝正畢與徹相別惟畢事

驅傳馬二聯言已歸彭城而徹留長安省選以下四句又另敘十七年以後事公赴省謁選者再至十八年春始有四門博士之授省選遠投足者謂此也公謁選入都復與徹相聚及公得官而徹方下第且有遠適故繼以塵祛淚皆二語皆惜別之

詞舊注通指為十六年事非也 漸階羣振鷺注

按揚雄劇秦美新云振鷺之聲充庭鴻鸞之黨

漸階又韓詩振鷺篇于彼西雍薛君章句曰鷺潔

白之鳥西雍文王之雍言文王之辟雍學士皆潔

白之人則漸階句語本揚子而義取韓詩蓋與下

句並切太學言之也又注引法言釋螟蛉是矣而

肖之矣下刪速哉七十子之肖仲尼也十字則學

誨之義晦矣

薦士 妥帖力排冪 妥帖二字本陸士衡文賦

使以歸期告 按公薦東野於鄭餘慶當在元和

初若貞元十九年餘慶方在郴州貶所不得有此

薦也 感物增戀嫪注聲韻云姻嫪說文云固也

按韻當作類姻固二字並當作姻

古風

題注

貞元之季人主方瀆貨外吏多掊克

以事進奉有稅外方圓之目科率日多民力重困
公詩殆以是時作史記平準書云告緡獄興商賈
中家以上大率破民偷甘食好衣不事畜藏之產
篇末四語意蓋本此

嗟哉董生行

生祥下瑞無時期

按時當從宋閩

本作休

汴州亂

題注

首章意乃公羊子所云下無方伯

次篇則上無天子也

利劍

題注

按此詩歲月無可考詳味詩意似爲

疾讒而作與汴州事無涉又孟東野送公從軍詩
中有行爲孤劍咏句疑指此詩從軍蓋公初赴汴

幕時也

汴泗交流 東坡文彭城三面阻水樓堞之下以汴

泗爲池 此詩張僕射有和篇其末云韓生許我

爲斯藝勸我徐驅作安計不知戎事竟何成且媿

吾人一言惠蓋擊毬之事雖不爲卽止亦深以公

言爲有當也

鳴雁 公在徐幕時有與李習之書云僕於此豈以

爲大相知乎將亦有所病而求息於此也違憂懷

惠卽有病求息意

桃源圖 題注 武陵太守當是竇常常兄弟五人

並以詩擅名有聯珠集行世元和十年常爲朗州

刺史朗州唐武陵郡之官寄劉夢得詩柳子厚和

之見柳集中韓有岳陽樓別竇司直庠詩及竇司

業牟墓誌二人皆常之弟常之刺朗亦見牟誌又

朗州至宋因避聖祖諱改爲鼎州 南宮先生疑是盧虞部汀韓盧倡和甚多詳見本集臨邛韓本題下注必與一郎官賡和廖本改郎官爲禮部郎非也尚書諸曹唐代統稱南宮蓋猶云南省不專指禮部如和虞部赤藤杖詩稱虞部爲南宮卽其證也

八月十五夜贈張功曹 滌瑕蕩垢 按揚雄文滌

瑕蕩穢

謁衡岳 廟令老人 按唐制五岳四瀆令各一人

正九品上掌祭祀此廟令蓋謂衡岳廟中令也

古意 題注 據宋建安魏本自公縣齋有懷以下

皆樊氏澤之語又自仲尼悲麟至微沈子幾晦哉

悉樊氏引沈顏登華旨之文也此下更有按公諸

詩及國史補所云公實如此初無佗旨也四語蓋顏自詫得詩微旨而樊氏深不然之故力辨其非廖瑩中昧於文義輒刪樊說四句全失其本意矣顏吳郡人傳師之孫唐末進士仕吳爲翰林學士登華旨篇文苑文粹並載

憶昨行

陽山鳥道出臨武注

按江南乃湖南之

誤又連屬廣南此宋制也唐則郴連並隸湖南宋朱新仲猗覺寮雜志云韓詩驛馬距地驅頻墮蜀人謂立地爲拒地立地者不容少休意按蜀人方言如土鏗岸漑之類屢見杜詩蓋少陵久寓蜀地故旅中所咏卽用土人語耳韓子陽山之行路不由蜀何故忽採方言入詩乎漢書甘延壽傳跋距注云有人連坐相把據地而能拔取之拒地之

拒殆與距同夫人以手據地可曰距則馬以足據

徐廣史記注據與據同謂以足據持之

地亦可言拒矣韓子時從臨

武踰嶺南出經鳥道之險驛馬力疲足倦據地不

前策之而猶不能升故曰驅頻墮正取虺墮義也

近者三姦悉破碎

按三姦斥伾叔文執誼李

軌法言注謂三桓陳恒王莽也故公永貞行云天

位未許庸夫干蓋直以窺覲神器之罪坐諸人又

篇中侯景九錫語其意亦同後人讀至此亦不能

無嘻其甚矣之疑也

君當先行我待滿

按公

詩意方欲與張君結隱嵩洛間所謂君當先行者

即蒙上投檄北去言之耳此與寒食出游詩皆敘

張方有邕管之辟並未及雍掾之除蓋此時張之

新命尙未下也注誤

從此直到耆與鮒注

詩

中者字別本有作者者故有闕宮以下十三字注
今正文既作者此注當削 昨者宋本作昨日則
以下八句似謂是歲八月朔順宗內禪之赦及細
考之非也唐制赦書日行五百里計旬餘即可達
郴州功曹以是月十四日在郴聞赦理或有之但
觀州家申名使家抑旬時使府駐潭州自郴申潭
文移往復其事豈一二日可了乎則作昨日自誤
也又洪譜亦謂此指憲宗受禪之赦不知憲宗受
禪無赦至踰年改元始頒赦耳其考尤踈

劉生詩

倒心回腸為青眸

按青眸即指上歌舞

之人公感春詩云豔姬踏舞筵青眸刺劍戟可以
互證倒心回腸言劉生自成意移耳為當讀去聲
且注不引宋玉高唐賦感心動耳回腸傷氣之文

而舉司馬遷書既屬蔓引至採阮籍青眼事尤誤

鄭羣贈簞首句注按笛當作簞蘄州貢簞見唐

史地理志故曰天下知

游青龍寺贈崔補闕去歲羈帆注按注乃採樊

氏語而江陵下刪原文埃命於湘中一句則與本

句湘水不相關矣年少按補闕十七登第少

公八歲元和初列官諫署年方踰壯故有年少得

途句

贈崔立之評事題注按公答崔立之書首稱斯

立足下蓋字斯立而名立之也注誤勿嫌法官

未登朝立之貞元中登第後復中詞科初授校

書郎秩滿除畿尉當時相傳畿尉有六道入為御

史評事京尉者有佛道仙道人道之分見崔琬御

史臺記京尉即赤尉謂長安萬年二赤縣也勿嫌
法官二句蓋言立之自畿尉召入止遷評事不得
御史但比赤尉尚有仙凡之異耳蓋除御史則登
朝為常參官矣唐常參官一名登朝官 本卷後
有酬崔十六少府攝伊陽尉乃別是一人非斯立
也斯立行二十六亦見韓詩與少府之行異又少
府以赤尉攝伊陽令未嘗為伊陽尉伊陽為畿縣
非赤縣注全誤 錢帛縱空衣可準 唐百官月
俸多給錢帛縱空謂官閒祿薄也 撼撼并梧注

潘岳秋思賦 按思當作興

哭楊兵部 題注 知當作刺知州之置自宋始唐

無此官又李習之陸欵州述言云言字衍

赤藤杖歌 滇王掃宮避使者注當如避道之避

按如下脫避舍二字

崔十六少府攝伊陽

題注

按詩意言己新居洛

下而崔以赤尉繼至遂與鄰居則公與崔相識在元和二年分教東都後非自江陵召入時也河南洛陽二赤縣皆在東都郭下崔之攝伊陽蓋以赤尉權畿令也

送侯參謀

題注

按公以國子博士分司東都至

是已三載詩云幸同學省官又云東司絕教授蓋與侯並爲分司官也已而公除都官郎分司如前而侯則往應河中之辟注未明曉人馬何躋騰注馬逝也按逝當作壯

感春第三首

放車載草農事濟

按時討王承宗

於恒州配河南府饋運車四千兩河南尹房式以

凶旱人貧難以徵發憲宗可其奏放車載草指此
事也起居諫議注按裴度爲河南功曹西川
節度使武元衡奏辟掌書記尋自蜀召爲起居舍
人非從河南入也注仍洪譜之誤方氏增考已辨
之矣

送李翱

題注

四年正月己酉

按下文是月有

乙未丁酉則其前不合有己酉當是乙酉之誤

送石處士

常山險猶恃

按公送石處士序云方

今寇聚於恒師環其疆恒州成德軍治所也時方
討成德帥王承宗中尉吐突承瓘統行營兵駐邢
軍久無功故有鉅鹿師欲老二句邢州唐亦稱鉅
鹿郡屬昭義軍先是承瓘兵深入成德境爲承宗
所挫故退屯於邢當石洪赴河陽時尚未有洗雪

承宗詔故曰去去事方急也注引赦承宗事誤

招楊之罘 食有肉與魚注馮謹遷之幸舍 按當

作遷馮謹幸舍

寄廬全 獨抱遺經究終始 按晁氏讀書志唐廬

全春秋摘微四卷祖無擇得之於金陵崇文總目

所不載獨抱遺經句殆指是書言之惜其不傳也

[Faint vertical text columns, likely bleed-through from the reverse side of the page]

[Faint vertical text columns, likely bleed-through from the reverse side of the page]

韓集點勘卷之二

東吳陳景雲

石鼓歌 歌中叙元和初爲博士嘗告祭酒以石鼓
所在勸其移置太學惜未之從故有中朝大官二
句歐公集古錄云石鼓在今鳳翔孔子廟先時散
棄於野鄭餘慶始置於廟按餘慶帥鳳翔在元和
九年乃韓子作詩後事竊因歐公之言詳考之知
韓公前此所告之祭酒卽餘慶也公爲博士之歲
餘慶以故相爲祭酒故曰中朝大官餘慶爲祭酒
三月旋拜尹洛之命意其蒞官日淺故公所請未
及施行耶至遷鎮鳳翔卽有移置孔廟事蓋理公
前語也然則石鼓之得久存於世不至銷蝕埋沒
如公詩所歎者固出自鄭相收拾之力而亦公在

太學有以啟之耳先儒作石鼓考者如王厚之鄭
漁仲諸公皆援据該博而初不言鳳翔移置事自
公發其端故表而出之

題炭谷湫祠堂 匣裏雌雄鳥 按鳥當作劍

送陸暢歸江南 名以能詩聞注 唐史公主傳無

雲陽主疑非雲安即岐陽之誤暢長慶初入江西

廉使王仲舒幕府至太和末以前鳳翔少尹預誅

鄭注事見唐史

送劉師服 師服歸後復入京師元和十二年駙馬

都尉于季友坐居喪宴飲得罪師服以與同飲笞

四十流連州貽持令各二句惜其不能誦之終身

乃至犯刑而辱親也

調張籍 刺手拔鯨牙 按刺手當與送窮文握手

覆羹同義注誤

寄崔立之未首句注

按西城謂寓都城西耳詩中

明言客居京城也藍田在都城東南不當言西雪

後寄崔丞詩云藍田十月雪塞關我興南望愁羣

山尤可證也注非不敢換眼窺注前說是送

窮文握手覆羹可證詩話一條當削視物隔襪

襪下注澄字謂唐人令狐澄本即上文姚令威

所據唐本是也詳見方氏舉正澄桂管廉使定之

孫相國楚之從孫附見舊史楚傳乾符中歷中書

舍人別見新史藝文志又舊史楚傳後附子縑及

孫瀉偶瀉下衍一澄字新史世系表及藝文志遂

誤以澄為楚之孫縑之子方氏亦沿其誤澄所著

有貞陵遺事見新志又嘗書其從祖楚白樓賦見

趙氏金石錄 咎責塞兩儀注 乃魏道輔語然

福不盈皆禍溢於世此班固賓戲之文又魏人章

疏所本道輔語猶未詳也 又觀名計之利注 志按

觀之名計之利莊子雜篇中語朱子偶失記耳

月蝕詩 按玉川月蝕詩洪景盧言指宦官吐突承

瓘用事見容齋續筆其說為長

孟生詩 宵默咸池音 按蘇子容詩孟郊篇什况

咸池自注云唐人題孟郊詩三百篇為咸池集取

退之詩義又劉貢父詩話亦云孟有集號咸池僅

三百篇至宋次道跋東野詩却云蜀人蹇濟用退

之贈郊句纂成咸池二卷一百八十篇與蘇劉之

密說不同未詳孰是 無為久滯淫 按國語底著

淫滯賈逵注淫久也此蓋倒用與上參差同

示爽 强顏班行內注 按題下注近之觀各科二

聯乃已登科入使府者則詩當作於長慶中非元

和間知制誥時也後注與前相戾又凡列朝班者

皆可云在班行內非典誥之稱後說尤無據

贈別元十八 題注 按樊說是特語猶未詳白序

作於元和十二年正裴行立帥桂時大林寺在江

州廬山元十八嘗構溪亭於山之東南見樂天詩

又樂天有送元十八出廬山從事南海詩蓋同游

大林後尋赴嶺外使幕矣本從事桂林而云南海

者殆以桂林亦嶺南五管之一故可通稱耶 英

英桂林伯注 按伯謂九州之伯左傳云五侯九

伯是也注未分曉 已覽贈子篇注 按注說是

也柳序稱元生之為學恢博而貫統韓贈詩第五

篇卽申言序意耳但考子厚送僧浩初序云近李
生礎自東都至退之寓書曰見送元生序云云退
之在東都送李生還湖南乃元和四年事則見柳
送元序必更在其前見序與貶潮相去已踰十載
不當止云想風采三年疑三年二字傳錄有誤柳
序作於永州方送元生爲湖嶺之游其栖止廬山
蓋南游迴棹後事也 嶷嶷桂林伯注 按歐陽
生哀辭云容貌嶷嶷然此句蓋亦稱其容貌之莊
至史記其德嶷嶷乃五帝本紀中稱帝譽語若引
以頌美臣下不倫甚矣

別趙子

婆娑句注

王衍當作王愆期事詳晉史

陶侃鎮荆時衍死久矣

除官赴闕

湓城去鄂渚

陸游入蜀記云自江州

至鄂州七百里泝流雖曰得便風亦須三四日韓
詩云湓城去鄂渚風便一日耳過矣按通典尋陽
西南到江夏六百里江夏鄂州理所

南山有高樹

題注

下篇非爲李宗閔作方氏辨

之甚詳語見下篇題下此注及下篇三字與後篇
當是爲宗閔作句並當削詩話尤贅

猛虎行

出逐猴入居

按猴方本作推朱子辨之

然猴字亦竊疑未安蓋猴非虎敵明甚若入居其
穴乃廟虎牙而餒之肉耳虎何憚而不敢歸穴乎
猴推二字俱傳錄有誤

奉酬盧給事

按東坡謝賜御書詩云袖有驪珠三

十四蓋化公此詩二語爲一也證以坡詩方說之

誤益明

南內賀朝歸

按唐南內興慶宮非人主正衙朝賀

地據新史穆宗母郭太后居興慶宮朔望三朝穆宗率百官詣宮門上壽則此南內朝賀乃朝太后也此詩疑公在穆宗朝除京兆尹與中丞李紳爭臺參後作唐人以中丞居風憲多呼爲法吏詩云法吏多少年磨淬出圭角法吏自指中丞也又皇甫湜作公墓誌其中叙爭臺參事斥紳爲佞臣有鑿其銜之語詩所謂圭角殆猶誌之言銜均指紳之得君勢盛也據實錄京尹之除在長慶二年六月其復除兵部侍郎則是冬十月觀篇首秋曦句則詩以秋日作正臺府不協移牒紛然時也致官九列齊舊注以此詩爲公官庶子曰作非也官庶子在元和中朝南內乃長慶間事前後了不

相涉又自舍人改庶子乃自要職徙閒官非貶也
此詩蓋作於貶潮還朝後三黜謂爲御史郎官及
刑部侍郎時凡三黜官耳况明言致官九列齊庶
子之官不得齊於九列則注說之誤益明矣 著
籍朝厥妻 命婦亦入朝太后注未明悉

雜詩

題注

按第七卷雜詩題下注公時爲右庶

子元和十一年作與譴瘡鬼題下注元和十三年
爲刑部侍郎時作二說皆未有確據又第十卷中
閒游題下語亦然皆當削

譴瘡鬼

出汝去莫違

按出當從宋閩本作咄

與張十八同效阮步兵

辟如兔得蹄注

按得兔

而忘蹄本莊子語王弼周易略例引之繫辭無此

文

城南聯句

禮鼠拱而立注

按文子曰聖人師拱

鼠制禮故曰禮鼠杜詩野鼠拱亂穴又注陸機當

作陸璣 浙王炊香粳 注說是折稌見內則尤

古浙作折之明證蓋浙與浙亦音異而義同耳又

魏文之文當作武 趙燕錫媯媯注 按媯字說

文云帝堯之女舜妻娥皇字也秦晉謂好曰媯娥

此注倒其文據漢書媯娥武帝所置後宮位號顏

師古注美好貌釋韓詩媯字顏注可與說文兼引

運田閒疆吐 按周禮以疆予任吐鄭注疆予

謂民有餘力復予之田若餘夫然疆吐本此

納涼聯句

掃寬延鮮飗

按此下脫注一條誤刊

入後秋雨聯句颺颺臥江汰下當改正

征蜀聯句

填隍儼密脩注

玉篇密脩健也蓋言

填隍士之奮力 戰恤時銷洗 恤當從宋蜀本作血

雨中寄孟刑部

按舊史簡自倉部員外郎遷司封

郎中新史所謂佗曹也又韓子誌李公墓文中稱簡爲

吏曹故曰佗曹也又韓子誌李公墓文中稱簡爲

工部尙書簡歷此官亦未見於史蓋與不著其除

刑部同則史之所略多矣 闔場再鳴先 按再

鳴者謂幾道登第後又擢詞科也鄭羣墓銘中有

再鳴以文句與此語意正同

遠游聯句

題注

按注謂遠游卽東野役於江南

時其說似是而非蓋役於江南乃赴溧陽尉任役

謂吏役也遠游在初春而歸期訂晚秋豈有赴官

而春去秋還者又詩中歷叙吳楚諸地蓋時將爲

湖嶺之游故云爾觀東野集中有過彭澤次沅湘
及連州吟諸詩殆皆此游作亦可略見游跡之遠
矣 取之詎灼灼 按取之劉貢父詩話作前知
為是

鄆城聯句 此年名作噩注 按元和二年當作十

二年 宮娃分綽約注 按風俗通當作通俗文

親交獻謏噓 按謏廣韻蘇奏切怒言也與下

噓字義相反不應連用宋杭蜀本皆作諛又與上

句詔字意複亦恐非是疑廋字之訛廋辭見國語

又唐書李藩傳王仲舒與同舍郎置酒邀賓為俳

說廋語相狎獻廋噓者殆亦同此耳 五狩朝恒

岱 按五岳獨言朝恒岱者因二岳在恒鄆二州

境時王承宗李師道皆未納土故也 雪下收新

人息注詩以晚秋作至雪夜入蔡乃是冬十月事
注不當引

義魚招張功曹 題注 按詩作於貞元二十年春
至陽山後乃俟新命於衡陽前一年也祭李郴州
文中叙投義魚詩事在俟新命之先而謝郴州寄
紙筆詩又在投義魚詩之前謝詩有虞卿正著書
句蓋方在謫居故云爾益可証是詩爲陽山時作
公以是冬與張署會宿界上而義魚在春故有思
我友憶同僚之語而招之來邑也舊注非

木居士 按題木居士詩洪譜不繫某年然譜以郴
州祈雨及郴口諸詩並繫之乙酉而木居士廟在
衡州屬邑公自郴赴衡嘗憩其地故留題云爾是
時羣邪之勢猶盛正公佗詩所謂伾文未揃時也

二詩蓋專指伾文言之柳子厚既坐伾文黨譴逐後與人書追叙伾文始末云素卑賤暴起領事射利求進者填門排戶誦公詩而論其世正可引柳木以注韓也次篇前二句申言伾文寒微暴貴出自糞土而驟升雲霄也當二人勢盛時其黨互相推獎有伊傅管葛之目伊傅殆指伾文而管葛則劉柳輩標榜之詞也後二句殆深斥當時之大言夸飾謂二人可伯仲伊呂之流歟伾文既揃後三十餘年而夢得作子劉子自傳猶盛稱其才謂有遠祖景略風是直取燼餘之木復雕畫之也喜雪授簡慕前規注謝靈運雪賦按靈運當作

惠連

入關咏馬

題注

舊注誤方氏舉正亦以此詩爲

元和改元西歸日作亦誤也公元和中自河南令
入爲職方員外郎因前過華州時見華陰令柳澗
事上疏論之坐是下遷博士公詩疑緣此而作華
州乃入潼關孔道也公先以言事遠謫迴翔久之
方有省郎之召乃復以抗直左官宜不能無槩於
中故以馬之一鳴輒斥自比耶若從江陵還朝時
公年未踰強仕不應有歲晚力微之慨矣樊澤
之曰歲晚力微不應鳴也其說是蓋不應鳴而鳴
斯爲妄矣唐人詩文中凡止稱關者皆謂潼關
至藍田武關則必繫關名以別之卽公集中亦然
可參考也李林甫欲絕言路有立仗馬一鳴輒
斥語事見本傳一鳴二字本此

梁國公主挽歌

移封大國新圖按公主始封普寧

梁元和中徙永昌及薨追封梁國自郡封進國封故
云爾龍輜非厭翟按周王姬下嫁車服下王
后一等乘厭翟車見詩鄭箋歷代因之唐制亦爾
觀新史趙國公主傳可見

和崔舍人咏月重門限禁局按崔時以翰林學
士兼舍人方供奉禁闈故有重門句然舍人內直
亦在禁中公掌制日嘗有仙郎宿禁中語

咏雪贈張籍紛紛碎若稜按稜有乃禾素回二
音此當從素回切廣韻曰擊也如從乃禾切不惟
乖韻義亦不協矣

酬王二舍人雪中見寄按題下注皆方氏語其說
良是至涯爲舍人本傳略之二語初疑其未諦按
王適誌文云中書舍人王涯獨孤郁考二人本傳

皆止以郎官知制誥未嘗官舍人而誌文與詩題云爾者蓋唐代凡知制誥官例得稱舍人以制誥本舍人典之而以佗官兼知卽職與之同故亦得稱之如劉夢得哭郁詩亦稱舍人此尤可證然韓集中祭虞部張員外文文苑英華詳具年月日下并列同祭姓名六人首云中書舍人王涯次云考功郎中知制誥韓愈未嘗以二人俱掌外制並稱舍人則方云涯爲舍人而本傳略之者其說亦是也韓子赴江陵途中有寄贈王二十補闕詩卽涯也又有次石頭驛寄王十中丞詩則仲舒也二王姓同行異卽見本集至王璠呼涯爲二十兄又別見唐史涯傳無爲舍人事而仲舒官舍人詳見碑誌及史傳或本題下誤注仲舒蓋由此又柳

子厚集中稱仲舒為舍人

獻弘農公詩自注

而仲舒除此

官在子厚歿後此又知制誥得稱舍人之一証也

送侯喜

如今便別長官去

按一官之長曰長官

漢孔氏書傳及鄭氏詩箋中皆有此稱其來久矣

奉和盧四兄元日朝回

戎服上趨承北極

按唐

制朝日百官班定金吾將軍先出班報平安戎服

句謂此

送李六協律

宋諸本題下皆注翺字殆因韓子代

張籍上李浙東書中有李協律翺故耳然翺之行

七非六也即見本集與楊子書此誤正與以王舍

人為仲舒同

贈張十八助教

題注

按四門國子兩署也博士

助教兩官也注合而言之殆近麀邊鹿鹿邊麀矣

和席八韻

題注

按席謙與杜子美同時名見杜

集與韓子相去殊遠又謙本道士注家之謬有如此者直當削去何必存而辨之

公時與夔同掌

外制故有倚玉一聯或作市誤也及公貶潮而夔

猶在右掖公之謫詞卽夔所草

廣宣上人頻見過

按廣宣以詩召入供奉內道場

有集名紅樓皆應制之作緣此頗怙恩挾勢干謁

公卿嘗私傳禁中語於韋右丞貫之貫之叱而出

之公詩意亦猶是也

太安池

舊注疑太安池卽安樂公主定昆池其說

近之下公主當年一絕卽咏太安池耳游太平公

主山莊一題諸本無之爲是唐本太安池下注闕

字殆偶逸是詩也據雍錄定昆池在長安西南十

五里故有臺榭壓城闈句又朝野僉載言定昆池
方四十九里直抵南山尤可作第二聯注 或疑
游太平公主山莊一題當繫是詩後下注闕字亦
可通

閑游 子雲祇自守注安帝時丁傅董賢用事 按

安當作哀

和李司勳過連昌宮 題注 遺老即謂開元遺老

時上距開元六十年當日遺民宜尚有存者如元
微之連昌宮詞亦借宮邊老人立言是也詩意蓋
謂昔年父老幸值元和中興皆欣欣復見太平之
盛惟安樂而思終庶克紹開元之治免蹈天寶之
覆轍耳宮雖置於顯慶而開寶間車駕幸東都屢
駐此宮故公詩云爾舊注皆未得其解

次潼關先寄張十二閣老 中興遺史紹興元年三

月張浚自陝西回蜀宣司幹官郭弈有詩云秦山
去盡蜀山來日照關門兩扇開刺史莫辭迎候遠
相公新送陝西回蓋改韓詩以諄浚富平喪師事
是可採入拊掌錄也

次潼關上都統相公 題注 按淮西之平裴度以
宰相督戰李商隱韓碑詩所謂腰懸相印作都統
是也舊注以韓弘當之誤

桃林夜賀晉公 題注 按桃林在潼關東詩蓋作
於次潼關前上都統詩中冠蓋相望句卽謂在桃
林遇銜詔西來者

送李員外院長分司東都 韓子從晉公還都後擢

刑部侍郎叙平蔡功也同時幕僚如馮宿李宗閔

皆遷官獨正封不得例遷且反奉分司之命是必有
有托其進者故腹聯云爾正封後歷中書舍人有
詩名牡丹一篇尤爲時傳誦見松牕雜錄

元日酬蔡州馬尚書

按蔡州疑當作華州舊史憲

宗紀十三年十一月以華州刺史令狐楚充河陽
節度使十四年三月以華州刺史馬總充鄆濮曹
等州觀察使則總之除華州當卽在十三年冬紀
偶略之而本傳云十四年自忠武改華州四字蓋
三字之誤耳四年元日總正在華公於都下酬其
去年元日在蔡所寄詩故中有三峯之語
答道士寄樹雞注 龍城雲仙二錄新舊史藝文志
皆無之洪容齋力斥龍城錄爲妄書而云或以爲
劉無言所著至朱子語類及張邦基墨莊漫錄中

則謂二錄皆王銍性之僞撰按無言名燾湖州人元祐三年進士有文譽東坡嘗和其詩銍亦北宋末名士陸放翁深推其記問該洽而生平好撰僞書欺世識者嗤之則洪張二說似朱張尤爲得實矣容齋又嘗言孔傳續白氏六帖採摭唐事殊有功而悉載雲仙錄諸事自穢其書雲仙散錄按孔帖兼載二錄而容齋獨舉雲仙蓋偶遺其一要之此二錄皆底下惡書也注家不辨而俱引之殆亦穢韓子之詩矣

左遷至藍田關

雲橫秦嶺

按班固西都賦曰於

是晞秦嶺通典云在藍田界

次鄧州界

早晚王師收海嶽

按海嶽之地皆在

鄆部時鄆寇將平故云爾先是淮西甫平卽有赦

令公亦冀平鄆之後當例降德音可遂因此內移耳詩以初春作因有雷雨句及仲春而海岳收矣緣降赦在秋故至冬始自潮移袁也

晚次宣溪

題注

此赴潮過韶作公以是春三月

至潮安得入夏尚在韶乎注非

題秀禪師房

按題驛梁詩題云貶潮州刺史乘驛

赴任其時方爲嚴程所迫塗中山水皆未暇游眺故後日移袁過韶寄詩韶守有欲借圖經開看佳處之語則到僧家把漁竿必非赴潮時事定量移後過其地而留題也後詩題下注尙未考及此

韶州留別張端公

江總虞翻

按南史江總傳梁

元帝徵爲始興內史始興卽韶州以江比張蓋用當州故事又吳志虞翻傳孫權徙翻交州裴注引

翻別傳有自恨骨體不媚犯上獲罪當長歿海隅
諸語公自以直諫謫潮與翻之徙交同又潮州地
亦漢交郡所轄故以翻自比舊注未明

游西林寺

題注

魏弘下脫簡字白樂天游大林

寺序可證弘簡卒貞元末有墓誌在柳子厚集其
游廬山蓋攝官江州刺史時也又長慶初有樞密
內臣魏弘簡乃姓名偶同者

自袁州還京

歲暮難相值一聯

按公以冬日次

安陸歲已暮矣然末聯又非專言時序也韓詩歲
聿其暮薛君章句曰暮晚也謂君年歲已晚詩意
本此蓋公早歲與隨州同佐汴幕是時舊寮多逝
僅存二人故深喜晚晚相值之難耳合後寄隨州
詩觀之義益明矣

雨中寄張博士 歲晚偏蕭瑟 按觀雷頰以下三

句則時非冬日可知兼觀白樂天和篇中有葉濕蠶病語蓋苦雨在初夏明矣落句歲晚之義與寄周隨州馬僕射二詩中歲暮歲晏同楚辭及年歲之未晏兮正公所本也

奉和張侍郎 再領須句國注 按衍鄆之二字東

平郡名須昌其屬邑唐之鄆州卽晉東平郡也通典云鄆州古須句國似尤簡宜當採之 仍遷少

昊司 馬總始以檢校禮部尙書鎮天平及召入未至復令還鎮加檢校刑部尙書故有是句司寇秋官秋月其帝少昊故云爾又天平屬邑曲阜本少昊之墟此句蓋雙關再鎮天平意注未明悉

早春與張十八博士 題注 令狐澄本作三弟亦

非楊嗣復行六非三也見白樂天集嗣復後入相
唐史有傳澄生長貴胄而於近時宰輔亦偶未悉
其行次足知考訂之難此諱行錄之可資採證也

館閣書目諱行錄一卷以四聲編登科進士族系
名字行第官秩及父祖諱主司名氏起興元二年
略大中七年其書出於唐季新史藝文志作諱行
略宋志作錄至撰書人姓名則二志俱逸之矣行
戶郎反或
讀本字非

送桂州嚴大夫 飛鸞不假驂 按驂鸞二字本江

淹別賦至范至能帥桂林著驂鸞錄則又取韓詩

語

奉和李相公題蕭家林亭 題注 按遇本作遘避

高宗嫌名易之非誤

...

...

...

...

...

...

...

...

...

...

...

韓集點勘卷之三

東吳陳景雲

原道 題注 按東坡云云亦伊川語誤以為蘇說

自蜀本韓仲韶注始及後閩中魏仲舉五百家注

本已削之此復採入何也

行難 自越州徵拜祠部員外郎 按越州乃浙東

治所觀察使領之李習之陸欵州述云由侍御史

入為祠部員外郎蓋自浙東使府御史召為省郎

師說 題注 按柳子厚誌文云衡湘以南為進士

皆以子厚為師則當時學者之宗仰盛矣何云人

不歸之耶且言子厚因學者不歸己而歸韓故有

答韋嚴二書其說尤鄙陋當削 授之書而習其

句讀注 按周禮天官宮正注讀字陸氏釋文云

戚如字徐音豆戚謂梁戚袞徐謂晉徐邈也山谷
蓋從戚讀非以意創又陸氏列戚於徐前則亦以
其讀為長故公羊序中句讀字不音以此文選笛賦注投

與迓古字通音豆
投句之所止也

進學解

弟子事先生於茲有年注

按此文作於

職方左遷後史傳甚明似無可疑而方本以時易
年其說尚有未安蓋此句乃伏後三年博士之根
作年為是此弟子雖假設之辭然唐時國子生亦
有久在學舍者如何蕃入太學二十餘年陽城諭
諸生以歸省是也 行雖脩而不顯於眾注 按
洎字與顯字義絕不相近恐是白之誤蓋誤白作
洎後又轉訛為洎耳 荀卿守正 按守正新史
文粹並作宗王東坡荀卿論言卿明王道述禮樂

則作宗王似較守正尤精切非訛也 欲進其豨

苓 按豨苓卽莊子所謂豨苓音義云一名豬苓

藥草名也方回猪矢之說妄矣

諱辨 與賀爭名注 按董說是也元稹爲禮部在

長慶初賀前卒久矣 律文三條皆本禮經故卽

引鄭氏原注釋之下文云考之於經質之於律謂

此 不聞又諱治天下之治 按治乃高宗廟諱

而此文及平淮西碑俱不避蓋德宗祔廟之年高

宗已祧矣文與碑皆作於後已祧不諱禮也 注

傳有五皓之稱 傳當作博見楚辭招魂王逸注

五白博齒也

釋言 爲我寫子詩書 按史言公舉進士投文公

卿間故相鄭餘慶頗爲延譽由是知名蓋鄭相知

公在早歲非自江陵召還始受知也公登第之歲
鄭入翰林其後鄭相自以職親地近遂與公久不
相聞及貞元之季公始登朝而鄭相已遠謫再秉
國鈞特擢公幕掾因悉徵其歷年詩文也 於後
之數月 按月南宋本作日為是洪譜同公始見
鄭相在元和元年六月而李翰林以次年正月入
相相去僅七月以下文再云累月語推之則前當
作數日明矣

張中丞傳後敘 愈嘗從事於汴徐 按雙廟在宋
州汴府支郡也又泗州亦徐府支郡從事二句蓋
貫下祭雙廟與過泗州兩事言之或本兩府作兩
州非也

汴州東西水門記

囂童噉噉

按囂童謂李迺也

與送張道士詩中呼吳元濟爲狂童同

藍田縣丞廳壁記 題下注貞元四年進士下脫六

年中博學宏辭科一句此條乃樊澤之語其說是

也又出於人三字亦見柳子厚誌文尤可證樊說

之有據 諺數慢必曰丞注 按公酬崔少府詩

云但聞赤縣尉不比博士慢與此記慢字同義即

公論鹽法狀中所謂散慢官也諺數慢必曰丞者

蓋當時俗語歷數內外官職之慢莫丞若耳數讀

上聲方說得之虞山錢受之在萬歷末作送楊縣

丞序引韓記以慢字作慢侮解誤甚 雁驚行以

進 按莊子外篇士成綺雁行 一躡古迹 按

漢書鄒陽傳人主必襲按劍相眄之迹師古注言

躡其古迹

科斗書後記 平劉展於淮西 按西當作南

鄆州谿堂詩序 且六十年注 按李納下當刪子

字補傳子師古師古傳師道十字

爭臣論 爲祿仕者也 按詩君子陽陽序君子遭

亂相招爲祿仕鄭箋祿仕者苟得祿而已不求道
行

改葬服議 子思曰三年之喪未葬服不變雖有其

文未著其人 按子思之說雖出孔叢子而自子

思以來未有行之者也惟南史張種值侯景亂奉

母東奔鄉里母卒又迫凶荒未葬服雖畢居家飲

食恆若在喪王僧辯奏起爲中從事并爲具葬禮

葬訖種方卽吉史傳中僅有此事則其服仍以

二十七月爲斷而未嘗不除也外此則未見其人

褫議 按時既勅旨令百寮集議公方官國子博

士亦百寮之一乃自言賤不及議者蓋唐代都省

集議惟朝官得與國子博士非朝官見公下年論權停選舉狀

故曰賤不及議也朝官亦各常參官文官五品以

上及兩省供奉官監察御史員外郎太常博士

答楊子書 題注 按柳子厚與楊誨之第二書元

和六年也時誨之年未二十若當貞元十七年韓

子與敬之書時甫數齡耳其非敬之之兄易明矣

敬之從父憑誨之父也子厚有憑從子承之哀辭

作於貞元之季承之踰冠而夭所作辭賦書論甚

偉見於哀辭則謂遠其兄甚者乃指承之耳又哀

辭云有弟哀號弟即敬之也

上宰相第三書 今閣下為輔相亦近耳 按漢書

霍光傳上曰將軍之廣明都郎屬耳師古注屬耳
近耳也公語本此顏注之近謂近日也趙憬賈耽
盧邁俱於貞元九年五月入相距公上書時已涉
三載似不得云近而公云然者蓋以三相在位歲
月較周公之輔相七年猶為近耳

代張籍與李浙東書 題下或注異字當作遜下以
異同二人並見唐史遜以元和五年自常州除浙
東見舊史憲宗紀而遜傳云由衢州遷新史因之
並誤也柳子厚以元和四年與遜弟建書末有已
白常州煦僕語謂遜也明年即遷浙東無刺衢事
當以憲紀為正

上張僕射書 題注 按少陵在嚴鄭公墓府其遣

悶呈鄭公詩中有曉入昏歸之句詩以秋日作疑

使院從事之晨入夜出起九月訖二月乃當時幕府定制如此殆恐季秋後晷短事繁故限出入之制耶公雖論此事亦未聞見從蓋舊制難改也

與崔羣書 書言從一官於此者謂爲四門博士也洪氏年譜甚明題下注蓋本之是時公已去徐三年在徐幕注當削

與陸祠部書 按書末言方今在朝廷者多以游讌娛樂爲事此謂王仲舒裴蒞諸人也王裴輩皆朝賢有清望者止以頻聚燕飲遂爲讒人所中斥官此書在諸賢未譴之前年蓋所見卓矣

答陳商書 按商字述聖官終秘書監嘗預修武宗實錄則大中間事

答呂鑿山人書 少安無跡 按左氏襄七年傳吾

子其少安注安徐也

送孟東野序

尸佼

按尸佼魯人秦相商君師之

鞅死逃入蜀見班史藝文志上脊到注亦據班志但四十六篇六當作二

送許鄧州序

題注

按以權文公送鄧州序參證

蓋從水部郎出守又舉其字曰叔載則仲輿乃名也又世系表仲輿作仲容鄧州作鄧州誤至或作志雍之注亦非志雍乃鄧州子見世系表雖恆相求而喜不相遇按喜一作苦爲是謝疊山文章軌範中無此一字覺句法尤健

送竇從事序

鉅海敵其陽

敵南宋臨邛本作敵

爲長海敵其陽謂越地之南風氣宣洩太甚也上句山隔其陰則謂越北風氣與中原否闕不通也

故下云風氣之殊著自古昔蓋蒙上山海言之

送李愿歸盤谷序

可濯可沿注

按本真文章正

宗引此作真本爲是

同時有兩李愿一隱盤谷

一爲西平王晟子南宋慶元中建安魏本此序後

附刊高從一記以證所送之非西平子按高跋卽

汪季路與朱子書中所謂家藏盤谷碑本有後語

是也然但以韓序及和盧郎中送盤谷子歲月考

之則兩李愿事跡自明無俟引高記也序作於貞

元十七年西平子時爲宿衛將至和盧詩則元和

七年也西平子方官節度使皆見唐史無栖隱事

送董邵南序

董生不得志於有司事在貞元中詳

見公詩時仕路壅滯兩河諸侯竟引豪傑爲謀主

由是藩鎮益强朝廷盱食此開成初宰相李石告

文宗云爾董生北游正幕府急才王室多事之日
文中立言尙欲招燕趙之士則鬱鬱適茲土者其
亦可以息駕矣送之所以留之其辭絞而婉矣

贈崔復州序

按詩碩鼠小序曰刺重斂也其首章

曰爰得我所二章曰爰得我直此序專爲于頓重
斂而作與詩人所刺同發端先言小民不得其所
能自直於鄉里之吏者鮮蓋卽用詩語而反之民
窮斂急惟仁人至庶有來蘇之望曰崔君之仁足
以蘇復人痛乎其言之矣

送張童子序

以及五都之長注

按序中言北過

大河之陽唐河陽軍治孟津非蒲州也蒲乃河中
節度使治所地在大河之東非河陽也方說誤
穀梁傳水北曰陽孟津在河南而軍有河陽號緣

節度使雖治孟津而領懷州刺史懷在河北故也

送何堅序

道之守陽公注

按十九年當從柳集

陽司業遺愛碣作十五年

送王秀才序

或爲事物是非相感發下脫於是有所

託而逃焉者也一句當從諸本增入

送王墳秀才序

馯臂子弓

按論語微子篇朱張

陸氏音義引王弼注朱張字子弓荀卿以比孔子

公指子弓爲孔門馯臂雖據弟子傳然王注似亦

未可廢

送李端公序

貞元間劉禹錫在杜佑淮南幕府與

僚友會飲聯句李端公益爲坐客之首唐人稱御

史爲端公蓋是時已爲使府御史矣後佑入朝府

罷端公宦久不調因游河朔入幽帥劉濟幕嘗作

詩有不上望京樓之句蓋中之鬱鬱深矣及至東都而韓子送之歸府諷其効忠燕帥修開元時藩臣之禮蓋深以乃心王室勗之觀舊史所載端公在幽州詩則知斯序立言之旨矣 十日十二子相配 按甲乙丙丁之屬十日爲母子丑寅卯等十二辰爲子見周禮匠人疏 其將復平 按兩平字文粹與宋浙蜀二本並同朱子蓋暗與古合

送區冊序

鳥言夷面

按周禮夷隸掌與鳥言貉

隸掌與獸言鄭司農云夷狄之人或曉鳥獸之言

鳥言本此

送楊少尹序

後世無工畫者

按晉顧愷之梁張

僧繇並畫羣公祖二疏圖見舊史褚無量傳 白

以爲其都少尹

按唐以河中府爲中都設大尹

少尹如東西兩都制其都者中都也

送鄭尚書序

風魚

慶元閩本作風雨爲是徐偃

王廟碑無怪風劇雨義同此也 家屬百人注

李訓當作鄭注朱子引通鑑偶誤

送水陸運使韓侍御歸所治序

題注

按魏文帝

及陳思王與吳質書中並有所治字正不必乙

韋侍講盛山十二詩序

皆集闕下注

按許康佐

歷官具見唐史本傳無刺洋尹京事則此使君必

非康佐與以嚴謨爲嚴武同

石鼎聯句序

龍頭一聯

按菌蠹見選南都賦又

易大有九四爻辭匪其彭于寶注彭亨驕滿狼見

經典釋文 磨礮去圭角

按禮訓儒行篇毀方

而瓦合鄭注去己之大圭角與衆人小合磨礮句

本此

祭田橫文 題注 按晁說非也首句明云貞元十

九年蓋作於未入汴幕之先公既抑於宏詞試光

範上書復不見省錄薄游鳳翔亦無所遇故發憤

太息於橫激於時貴之不能得士耳至從裴相平

淮西乃此後二十餘年事尤不足置辨

歐陽生哀辭 閩越人舉進士由詹始注李成公錡

按錡當作椅獨孤及福州學碑銘閩中無儒家

流公至而俗易謂椅也新史宗室世系表蜀王湛

五世孫椅為福建觀察使 李翱既為之傳 按

李習之作詹傳歐公云已逸而新史所載事迹有

出於哀辭外者蓋宋子京好採摭小說故也

祭穆員外文 題注 按篇首不載某年員外之父

秘書監寧以貞元十年歿又三年母裴太夫人繼
亡故曰痛毒之懷六年以并也又注中宣州觀察
使當作秘書監爲宣使者乃秘書長子贊員外之
兄也

祭郴州李使君文 按權文公李郴州志言時宰盛
推其理行方圖陟明而韓子祭文則深惜其被讒
欲爲之雪謗於身後蓋嘗挂吏議志特徵其詞耳
覷鱗介之驚透 按驚透二字本左太冲吳都
賦揚雄方言透驚也

祭虞部張員外文 存皆表白 按表當從宋本作
衰又內迫家之亦當從宋本作家私

祭河南張員外文 一又相語 又當從宋本作夕
七曰鹿魚注 鹿魚當作鹿角 首下尻高

尻當作尻注同 丞相南討注 十六年當作十

二年 議兵大梁注 都統下使將二字有誤

祭裴太常文 題注 按文苑此篇乃元和九年作

舊史憲宗紀元和六年皇太子寧薨國典無太子

薨禮司業裴蒞精禮學持勅於西內定儀又新史

藝文志蒞元和太常少卿蓋從司業遷太常以九

年卒官也蒞所著有內外親族五服儀二卷書儀

二卷並詳新志則太常為蒞無疑舊注云其人無

可考非也又蒞在貞元末為韋執誼所讒斥官於

外亦見本集後順宗實錄末卷

祭侯主簿文 遣男殿中省進馬估 按進馬官名

屬殿中省見新史百官志又續通典云進馬侍衛

中資蔭官唐舊儀凡大陳設馬在樂懸之北與大

為相次進馬二人戎服執鞭侍立馬左隨馬進退
祭馬僕射文 命公并侯 按方鎮表元和十三年
廢淮西節度使忠武軍增領蔡州時總方自蔡移
許故曰并侯舊注未明 遂殿交州 謂為安南
都護也詩殿天子之邦毛傳殿鎮也公本此注誤
祭鄭夫人文 百口偕行 按公謫潮州有過始興
感懷詩云目前百口還相逐舊事無人可共論蓋
追憶昔日始興北還後偕行避地之人也以詩證
文則佗本作百日之誤益明矣

祭十二郎文 三世一身 語見北史王慧龍傳

河南少尹裴君墓誌 召公主書記 按公嘗記南

陽公鎮徐州十一年中掌書記者凡三人許孟容
杜兼李博獨無復名當是復先以記室辟既至而

更授佗職耳公作記之明年南陽捐館觀此誌中
三遷句及在徐府勤而有勞諸語則復之從事於
徐有年非其至在李博後故不獲挂名廳記也又
南陽薨時馮宿實主書記此則繼博爲之者復之
未嘗主記更明矣

河南少尹李公墓誌 改度支郎中使注度支或作
屯田 按使字當屬下句讀使侍郎者領度支使
之侍郎也今誤斷其句更以其下不禮其屬觀之
則作改度支爲是屯田非度支屬也

江西觀察使韋公墓誌 不如屬之河東便 按此
河東乃謂蒲州非晉陽也與韓弘妻誌公居河東
同蒲州古河東地以晉陽爲河東自唐代始而蒲
州則置河中府矣

河南府王屋尉畢君墓誌 繼數尹 按徐之從事

爲河南尹謂杜兼也兼以元和四年十一月卒繼
之者陝號觀察使房式五年冬式自河南徙宣歙
以鄂岳觀察使郝士美繼之詳見舊史憲宗紀

河中府法曹張君墓碣 按文先述圓妻語曰妾夫
在嶺南其中人曰事宣武軍節度使得官至監察
御史坐事貶嶺南正與李肇所記合圓之遠貶已
大書著明而注尙云未嘗略及貶謫意何也圓旣
遷掾河中其吏幹曰益有聞汴帥忌其向用修隙
因啗以甘言斃之逆旅此固情事所有此文詳書
其遇害之地亦不爲無意也

贈司勳員外郎孔君墓誌 一歲再奏 按盧從史
以貞元二十年帥昭義至元和五年而敗首尾共

七載孔戡之去昭義卽從史流日南之前一年故
曰從史居五六歲益驕君爭云云則戡之留昭義
久矣留字若連一歲爲句殊與前文不相應留字
當屬上讀而一歲再奏四字絕句蓋從史初甚重
戡故一歲中奏遷其官者再也

河南尹杜君墓誌

字某

按兼字叔通見權文公

送杜少尹序而史云字處弘蓋有兩字

韓集點勘卷之四

東吳陳景雲

烏氏廟碑

盧從史始立議

按漢書鄒陽傳羊勝

公孫詭欲使梁王求爲漢嗣袁盎等皆建以爲不可師古曰建謂立議則立議猶言建議也或以立字斷句非至馬都山按樊氏所謂或者之論皆溫公考異中語蓋溫公所見韓集乃祥符杭本其文作走可突干渤海上海至馬都山渤海下無擾海二字與今本不同故公云爾至謂公未見許碑樊說是也唐平盧一鎮介契丹渤海之間契丹在平盧西北而渤海在其東馬都山當是平盧東境與渤海接壤之地又唐以平盧帥兼領海運事自承玘旣却渤海之兵於是東陲息警運道無虞

珍做宋版印

故歲罷運錢以千萬計也 石嶺軍使 按石嶺

軍在河東忻州秀容縣因屯軍邊地故有積粟厲

兵出入畊戰事若左領軍則職典禁旅不當有下

二語且左領軍止有將軍無軍使或本自誤也

河東節度使鄭公神道碑 自號白雲翁 按令狐

楚表奏十卷蓋集前後佐桂林太原二府事四帥

幕下所草非專為鄭儋從事時作也初桂帥王珙

奏辟楚楚以父官并州不得奉養未嘗預帥府燕

樂滿歲謝歸太原諸帥皆高其行相繼引入幕府

及後表奏之編自佐桂林幕府始自號白雲孺子

蓋用狄梁公登太行遙望并州親舍事方氏媚儋

之諂恐承小說之失實也

田氏先廟碑銘 勿亟勿遲 按春秋桓公八年春

正月己卯烝公羊傳曰譏亟也注亟數也釋文音去冀反勿亟義本此或讀居力反作急字解者非可作承輔按漢書淮南衡山王不務遵蕃臣職以承輔天子

劉統軍碑

以勢自憚

按劉除陳州由佐新帥上

官說却蔡兵之功元侯卽謂新帥言劉之威名本

在節使上而能盡巡屬之禮以事大府故曰以勢

自憚也注引韓全義事殊誤

峻之大夫

按峻

猶陟也張說平貞脊碑銘云嚴嚴憲府公三峻之

與此同作浚非

及癸巳歲

按統軍以元和八

年五月許州水災事徵還六月歸第至冬而卒秋

涌水出之秋字定傳錄誤况下文明云六月隆熱

則上不應言秋尤明矣

清河郡公房公墓碣 字某 按啓字開士見劉夢

得集 人吏迎觀望見 按天寶末房太尉爲扶

風郡守郡後改鳳翔府當其孫爲此府參軍時乃

祖故吏民定尙有存者故云

太原郡公神道碑 興官耆事 按耆與嗜同王介

甫葛度支墓銘有樂職嗜事語正用韓文尤可證

明朱子之說

曹成王碑 救兵州東北屬鄉還 按兵州文章正

宗作其州爲是蓋蒙上梏其州之文謂隨州也屬

鄉方本作厲鄉與唐史合舊史曹王皋令伊慎擊

李希烈兵於隨州厲鄉大破之按漢書地理志南

陽隨縣下注厲鄉故厲國隨縣在唐爲隨州故九

域志云厲鄉隨州村名蓋本漢志朱子言當作厲

鄉蓋從嘉祐杭本又言厲鄉屬亳雖本史記老子苦縣厲鄉曲里人注然曹王戰處乃隨之厲鄉非亳境也又權德輿伊慎碑引兵攻隨走康叔於厲鄉康叔李希烈所遣將也蓋曹王遣慎擊走希烈兵之在厲鄉者故曰救耳權韓兩碑尤可互證又自稽隨光化以下五句皆叙取隨州事無及安州語朱子去安尙遠之說亦非

扶風郡夫人墓志 司徒侍中莊武公之冢婦 按

侍中二子少府其次也則盧夫人乃介婦今云冢婦未詳或疑少府是嫡子故云爾然以公少府兄行狀考之蓋同母無嫡庶之異也 長子後注

按繼祖乃德宗賜名事見李肇國史補則少監誌云諱繼祖非有誤也朱子之說誤

秘書少監獨孤府君墓誌

按誌言君生之年憲公

歿世則始生而孤明矣注二歲語誤

秘書兄朗

舊史誤以爲弟新史已正之蓋據公誌

誌言上

將有所相不可於衆謂裴均也不著其姓名蓋緣

均帥江陵時公嘗在幕府以故吏爲府主諱耳與

秘監同諫之李約其斥均之辭甚醜見新史均傳

但史誤以爲德宗時事亦當據公誌正之

秘監

妻權夫人以夫歿之歲十月卒其父文公作誌言

子晦生十年卽此誌之天官也誌以四月作蓋其

時猶未命名故稱其小名耳本傳及世系表皆言

名庠必又後來所改也

虞部員外郎張府君墓誌

孝權大父注

誌言大

父諱孝先注或作奉先按或本是也唐人重家諱

不應犯祖名

衛府君墓誌

贈太子洗馬諱某之孫注

方氏增

考年譜云此誌今本皆作衛之乎及質之善本實中立非之乎中立字退之所謂善本卽汪彥章所據王仲信本也方氏又云中立餌奇藥求不死而卒死故白樂天謂退之服硫黃一病訖不痊孔毅夫陳無已之徒皆指以爲公晚年惑金石藥非也觀白氏所紀退之微之杜子崔君三四人皆非有聞於時者適以中立之字偶同耳其說最辨而核詳見慶元魏本所刊韓文類譜中廖瑩中集諸家之說採魏本爲多方氏此條獨在所削且於李博士誌後復引孔陳云云蓋反以爲篤論矣

河南令張府君墓誌

抑首使促注

按注上齟字

當作齷應劭漢書注喔躡急促貌躡卽齷也二字
非特音同其義亦一 帥佗遷注李鄘爲江東節
度使 江東當作河東

劉統軍墓誌 父訟注 父訟或作父誦朱子謂名
訟無理疑避諱而改然後漢有司徒尹訟見段熲
傳是古人已有名訟者

鳳翔節度使李公墓誌 宿衛四十餘年 按李公
以建中四年扈蹕立功及元和六年自金吾出鎮
其居宿衛二十餘年耳四字傳錄之誤

平淮西碑 題注 按羅隱記石烈士事此碑立於
蔡州及仆碑磨文後段文昌重撰其文云勒銘淮
浦尤明證也後州人以裴晉公督師平蔡特立廟
其地兼移段碑於廟庭至宋政和中州守陳珣因

謁晉公廟讀碑文大不平卽磨去之重刻韓文事
見夷堅志先是祥符間吳興姚鉉輯唐文粹採文
昌作而置韓碑陳姚二事前後相反如此 題下
注愬妻唐安公主也 按公主下脫女字 稂莠

不薶

按薶當從詩釋文讀呼毛反

遂定易定

注義成節度使張茂昭

按義成當作義武義成

乃鄭滑軍號非易定二州地

今益以汝注徙隸

汝州

按隸當作理河陽軍本治盟津今移軍駐

汝

惟是朔方注

按陝州屬陝號觀察使所轄

非東川地注誤

元濟盡并其衆注騎軍

按據

史騎當作騾

其往撫師

按漢書李廣傳司馬

法曰振旅撫師以征不服

凡茲廷臣注

按判

官書記下孫氏原注有皆朝廷之選上皆從之判

官謂李正封馮宿書記謂李宗閔不著三人姓名
注仍史文之舊也廖本刪此二語是直以判官書
記之職皆行軍司馬一人兼爲之疎舛甚矣河
南附起注 按汴當作鄆時鄆帥李師道方與蔡
寇相首尾與汴無涉又統諸軍討蔡者卽汴帥韓
弘也 三方分攻注 按三方分攻卽上所謂道
古攻其東南文通戰其東愬入其西也三方中卽
已伏後西師之根矣至大軍北乘二句始詳敘顏
胤武合攻其北之事自常兵時曲至鄆城來降乃
挈前文大戰十六得柵城縣二十三之要而言之
試之新城二句則所謂顏胤武合戰益用命也自
是賊勢日蹙專備北境故西師得成搗虛之功西
師句尤與上分攻相應細尋文義舊注之滅裂自

見矣

南海神廟碑

題注

觀察使當從方氏舉正使上

增支字支使之職與書記同公鄆州溪堂詩序作於此碑後中有從事陳曾當卽是人蓋旋去桂幕而從事於鄆也來享飲食注享或作慕按慕當作纂揚子法言纂取也此纂字所本古本揚子亦有誤作慕者蓋兩字相似易訛也

羅池廟碑

侯之船兮兩旗五句

按舟中樹兩旗

設寓馬以迎神此嶺外祀神舊俗見南宋臨邛韓本注蓋侯船及乘駒諸句皆紀其實也東坡書此詩泊之作汨之然似從集爲長蓋因中流阻風停橈故有待侯不來之悲耳北方之人兮二句

此言中原士大夫方多騰口吹毛者也據唐史子

厚從永州召還復有嶺外之行蓋深爲言路所排所謂爲侯是非者此也北一作此爲一作謂皆誤

宋邱崇重修羅池廟記略云柳侯祠羅池三百餘年英靈猶存元祐五年賜額曰靈文廟崇寧三年賜爵曰文惠侯承禧踐籩袂嘗相屬所謂施利錢者歲不知幾何率以十萬爲公帑用餘則廟得之以備營繕此記乃政和初作施利錢卽後代香錢也至紹興末加封文惠昭靈侯致和元年又進封文惠昭靈公見元史蓋柳侯著靈南土州人祀之久而益虔碑文所謂欽於世世者信矣

江南西道觀察使王公神道碑 公字弘中 按法言修身篇或問士如何斯可以裊身曰其爲中也弘深王公字本此 按仲舒連州之謫乃爲同列

所擠同列者韋執誼也時雖在郎署方承恩用事故得逞其私與王叔文無預

許國公神道碑

恆無宿儲

祥符本無恆字爲是

見舉正碑作於長慶中應避御名

京兆尹

時

韓方尹京監護喪事者卽公也故公祭韓令公文中
中有云錫秘物之必周余將命而臨視是也祭文
乃門人沈亞之代作亞之時爲櫟陽尉京兆屬邑
也

柳子厚墓誌

勇於爲人

按爲當讀于僞反鄭康

成詩箋云爲猶助也史言王叔文密結柳劉諸人
定爲死交勇於爲人卽言子厚黨助叔文而微其
辭也 不自貴重顧藉 按顧藉之義與顧惜同
公上留守相公啓云無一分顧藉心是也或以二

字屬下非 八司馬初貶有永不量移之命後八
人中惟程异以大臣李巽力薦復得進用位登宰
輔可謂有鉅力推挽矣然物望素輕歿於相位旋
卽身名俱滅視子厚之以文章傳世百世不磨者
所得孰多耶异先子厚卒當韓誌柳墓時正兩人
蓋棺論定之日故誌中云云似專爲异而發也太
史公有言富貴而名磨滅者不可勝記惟侗儻非
常之人稱焉韓子之軒輊柳程猶斯志也

國子司業竇公墓誌

題注

按送竇從事序中稱

殿中侍御史者蓋先是司業佐留府之官也誌中
明言佐六府五公八遷至檢校虞部郎中則前此
使府所歷官具在其中矣注何以不載爲疑耶
爲郎官令守 按郎官虞部都官郎也令守洛陽

令澤州守也守字句絕又前鄭羣墓銘已有郎官郡守語正與此同考異欲乙令守二字則當屬下慎法爲句恐非

尙書左丞孔公墓誌 不能進退郎官 按唐制郎官有缺左右丞舉之亦有已在郎署而爲丞所汰且甫除而丞不放入省者是郎官進退丞皆得主之故戮自以不能舉職爲嘆也

殿中少監馬君墓誌 按公以貞元三年至京師是夏平涼有吐蕃劫盟事公兄御史弁遇害始主和戎之議者馬燧也公見燧殆在劫盟後燧念弁新歿王事故撫卹公者特厚耳 玉雪可念注 王丞相下當有夫人二字見世說注

幽州節度判官張君墓誌銘 自申於闡明 按張

平子靈憲中論日之明云由明瞻闇闇還自奪韓子語似本此

大學博士李君墓誌 司空之後注 後文當作孝

文 胥其出注 廉頗當作趙奢 年四十八注

按長慶三年歲在癸卯干以癸卯卒年四十八則其生當在大歷十一年丙辰非元年也又誌既載卒之歲月及得年若干則始生之年自見此注尤贅 廣川書跋云李干誌李翱書誌云干字子漸韓集無此按子漸之字當取鴻漸於干義其名從干爲是

毛穎傳 宋王象之輿地紀勝云中山在溧水縣山出兔豪爲筆最精韓文毛穎傳中中山謂此按中山兔毫亦見白樂天雞距筆賦白又有紫毫筆詩

則云貢自宣城以新史地理志參証宣州貢筆與詩語合而溧水則宣之屬縣也則宣城之貢卽出自中山明矣但當秦始皇時楚郡壽春在江之北而溧水中山則江南地秦未克楚都其兵不得先渡江而南朱子所謂雖寓言而不能無失者殆謂此也

鱷魚文 將其醜類 按定四年傳將其醜類注醜衆也文末年傳注醜類惡物也

太傅董公行狀 其子乃復欲爲士寧之故 按乃當從唐史作迺李萬榮子名也乃迺雖同而字有今古之異諸注家不注萬榮子名蓋皆誤以爲虛字而略之耳

薦侯喜狀 題注 鬱爲選首者蓋州家牒送舉進

士之首如張籍舉進士由汴州牒送是其証也汝州刺史領防禦使不隸大府故亦得舉士 按盧虔終秘書監從史之父也

爲裴相公讓官表 又毗邦憲注 按元和十年晉

公以中丞兼刑部侍郎故曰又毗邦憲非別除也注中爲字當作兼

舉錢徽自代狀 按集中舉人自代狀凡六篇此其一也餘五篇皆先具新除之官於前如國子監尚

書兵部之類此狀乃除刑部侍郎時進首行狀字下當有尚書刑部四字蓋偶脫耳 常參官上後

三日舉一人自代諸州刺史亦如之皆建中制也

以韓子歷官言之如御史職方比部考功中書舍人兵部侍郎及兩任吏部侍郎皆當有舉人自代

狀而集止有六狀蓋逸者已大半矣惟都官之除
時方分司東都尙未入省不當輒舉自代人耳又
刺袁潮二州止有袁州舉韓泰自代狀而潮州舉
狀亦逸之當時雖左降官蒞州亦例舉人自代如
柳子厚集中有柳州舉自代人狀卽其証也

舉張正甫自代狀 按長慶中正甫爲尙書右丞駁
于頔更謚事見頔傳中其剛直可知事在公舉自
代後

論鹽法狀 今臣計其新法亦用十萬不啻 按啻
字句絕不啻猶言不止也左傳鮮不五稔杜注少
尙當歷五年多則不啻又柳子厚序棊亦有相去
千萬不啻語

海水

題注

公登第後未嘗還江南不知注說何

據

贈崔立之 題注 按正集有酬崔少府詩乃別是

一人非崔丞也又少府行十六與崔丞行二十六

又不同注誤

上崔虞部書 儻焉而不終注白頭而新 按漢書

鄒陽傳作如新董說蓋本新序非誤也

通解 必謂偏而不通者矣 按此句下脫其可不

謂之大賢者哉一句當從宋閩本增

河南府同官記 題注 此記洪譜繫於元和四年

朱子於本傳附注從之蓋記中既五年句乃合永

貞元年言之上下文義甚明此注中元和五年當

作四年又既五年注當削 開府漢陽注 按均

入為僕射後加同平章事出鎮襄陽記中兩稱宰

相以其新命言之也僕射不爲正宰相自唐中葉後已爲定制今注脫其加使相事似未明悉歲時出旌旗按東都留守其之官例賜旗甲見唐史呂元膺傳出旌旗城外衙之卽謂出所賜旌麾也

潮州請置鄉校牒

無所從學爾

考異云爾或作

耳非是按爾字若作語助句絕與耳字無異公佗文中亦有爾耳二字兩本互異者考異但並存而已今由朱子作耳非是語推之此爾字似當作爾汝之爾屬下句讀蓋此牒卽授趙德秀才故云然也如公上張僕射書云受牒之明日亦是受署幕職文牒耳又韋執誼貶崖州司戶刺史請攝軍事衙推有勿憚縻賢之牒此尤刺史署衙推卽牒其

人之明証元稹草陳諫除官制中有爾諫語與此牒中爾德類蓋當日自有此文體

順宗實錄卷一 太常卿許孟容撰議文 按議似

當作誅

卷二 追故相忠州刺史陸贄 按陸相貶忠州別

駕卒於貶所未嘗有刺史之授詳見實錄第四卷

此刺史二字誤

卷三 五坊小兒 按南部新書五坊使者鵬鶻鷹

鷄狗謂之五坊置使分領之若小兒則又以小閹

分隸五坊而給本坊役使者也 張薦卒於赤嶺

東紇迴辟 按舊史張薦使吐蕃至赤嶺東被病

歿於紇壁驛吐蕃傳其柩以歸此迴紇辟乃傳錄

之誤

卷四 以尚書左丞韓臯 按新史方鎮表元和元

年始升鄂岳觀察爲武昌軍節度使當順宗世鄂

岳未嘗爲節鎮武昌軍節度使五字疑衍 六月

乙亥 按舊史順宗紀是年七月戊辰朔乙亥乃

七月八日也六月無乙亥一本作己亥爲是又一

月中前有乙亥後不當有癸丑以下文癸丑推之

乙亥之誤益明 贈故忠州別駕陸贄 按追贈

陸贄陽城事不繫月日以舊史考之乃七月丙子

蓋日月並脫也又潘孟陽除官之命乃戊寅非戊

午七月亦無戊午並當以史爲正 議者言參死

由贄注 按贄請令長舉屬吏狀長下脫官字

卷五 貶韋執誼崖州司馬 按新史宰相表執誼

之貶在是冬十一月又司馬新舊史執誼傳並作

司戶而本紀及宰相表作司馬與實錄同當是自
司馬再貶司戶猶劉柳諸人初貶刺史再貶司馬
耳又劉柳等七人但謫遠州無一過嶺者而崖州
之貶獨再涉鯨波所竄之地視諸人爲最惡宜降
秩尤卑紀表第舉其初貶之官故與本傳互異又
執誼至崖州刺史李甲牒攝牙推事蓋緣司戶與
牙推皆州幕官故可牒之兼攝若司馬乃州之上
佐刺史不得牒署矣此亦執誼再貶司戶之証
張萬福元和元年卒按前書萬福卒繫六月己
亥之後但未書日耳則其卒之年月已詳元和元
年四字乃衍文永貞二年正月景戌朔注按
順宗之崩在正月甲申則此月之朔非景戌也戌
作寅爲是

飲城南道邊 題注 按題中既不著中丞之姓又

無佗事可證何由知其爲晉公此注當削

本傳 終秘書郎注 已詳疑已誕之誤王性之有

博洽名然其雜著中往往語涉齊諧此說亦近之

調四門博士注 以公博士之除在十七年證

洪樊二譜之說最爲辨悉按公十七年與楊敬之

書有僕守一官且不足以修理語是必在已授博

士後益可證公爲博士非十八年也 權知國子

博士注在江陵有答張徹詩 按答張徹詩乃公

從江陵還朝官國子博士日作非在江陵時也

華陰令柳澗注 郎中當作郎官 轉考功注

竄走當作竄定 進中書舍人注去年冬 按洪

譜原文作九年爲是

御製文并武辛編表

皇矣當并覽矣 皇中書舍人王定辛冬 尚典

華金令時識主人 腹中當并須官 韓宗臣

或以趨對陣官 國平謝士日前持去 以趨對也

謝士五五五 刻有答題謝稿 謝答題謝稿以公

士謝益取題公 爲謝士持十八辛 謝我列子

書有對卡一官 且不以及趨對稿 長以答已謝

共與二謝文 稿是發謝稿 謝公十七辛 謝謝文

謝國門謝士 志以公謝士文 謝答十十五 謝

謝答答答其 謝書中 謝書 謝書 謝書 謝書 謝書

本謝 謝答謝書 謝書 謝書 謝書 謝書 謝書

謝的書 謝書 謝書 謝書 謝書 謝書 謝書

謝書 謝書 謝書 謝書 謝書 謝書 謝書

書後

近代吳中徐氏東雅堂

堂主人徐時泰萬歷中進士歷官工部郎中後崇禎末堂

已易主項官詹煜居之煜後以降流賊名麗丹書里人燼而焚其宅堂遂燬于火今僅存池塘遺跡而已

刊韓集用宋末廖瑩中世綵堂本其注採建安魏仲

舉五百家注本為多間有引佗書者僅十之三復刪

節朱子單行考異散入各條下皆出瑩中手也瑩中

為賈似道館客事迹見宋史似道傳其人乃粗涉文

藝全無學識者其博採諸條不特遴擇失當即文義

亦多疎舛閱者但取魏本及考異全文互勘得失立

辨矣瑩中之敗在德祐元年則書出德祐前可知徐

氏刊此本不著其由來殆深鄙瑩中為人故削其氏

名并開板歲月耶今世綵堂韓集與瑩中所輯似道

悅生堂楔帖並為世所希有矣廖為閩中著姓世有

眉壽高曾多及見曾乎故以世綵名堂朱子高第廖子晦亦其裔也至於瑩中遂以相門狎客墮其家聲而猶遵奉朱子之書蓋先世之緒言猶在不敢忘淵源所自也

雍正丁未春日長洲陳景雲書

男黃中手錄

小門生全州蔣良騏書諱文